

KENYATAAN MEDIA

SWM KASIH KONGSI KEGEMBIRAAN DEEPAVALI BERSAMA PENDUDUK DUN PAYA RUMPUT

MELAKA, 5 NOVEMBER 2023 – Sempena sambutan perayaan Deepavali tahun ini, SWM Environment Sdn. Bhd. (SWM Environment) dengan kerjasama Pejabat Jawatankuasa Pembangunan dan Penyelarasan Dun (Japerun) Paya Rumput meraikan 4 buah keluarga menerusi program ziarah kasih bagi penduduk di sekitar DUN Paya Rumput menerusi entiti tanggungjawab sosial korporat SWM Kasih.

Ziarah tersebut disertai oleh Yang Berhormat Datuk Rais Datuk Wira Yasin, Exco Kanan Perumahan, Kerajaan Tempatan, Saliran, Perubahan Iklim dan Pengurusan Bencana negeri merangkap Ahli Dewan Undangan Negeri Paya Rumput bersama Tuan Haji Mohd Norlisam Mohd Nordin, Pengurus Besar Korporat, SWM Environment dan Tuan Khairuladha Ab Mutalib, Pengarah Perbadanan Pengurusan Sisa Pepejal dan Pembersihan Awam (SWCorp) negeri Melaka.

“SWM Environment sentiasa komited mengadakan program berbentuk kebajikan bagi menyantuni pelbagai lapisan masyarakat yang kurang bernasib baik terutama ketika perayaan-perayaan utama yang diraikan di Malaysia. Melalui program SWM Kasih Cahaya Deepavali ini diharapkan dapat memberikan sinar kegembiraan kepada mereka yang memerlukan dan seterusnya menjadikan sambutan Pesta Cahaya mereka tahun ini lebih bermakna,” kata Tuan Haji Mohd Norlisam.

Tambah beliau, “Kami di SWM Environment juga turut mengingatkan mereka untuk bersama-sama mengamalkan 3R dalam kehidupan harian mereka. Ini bukan sahaja akan memberi manfaat kepada alam sekitar, tetapi juga akan membantu kita menjimatkan wang dan sumber-sumber yang berharga. Dengan usaha bersama, kita boleh mencipta sebuah dunia yang lebih hijau dan lestari untuk generasi akan datang.”

Pada program yang turut disertai warga kerja SWM Environment dan Japerun Paya Rumput, mereka menziarahi empat buah rumah yang menerima sumbangan berupa barangan keperluan diri dan barangan keperluan dapur kepada K Kamachee, 74, C Armadass, 56, dan M Parsuraman, 64. Seorang lagi penerima T Manimaran, yang berumur 41 tahun, turut menerima barangan keperluan diri, barangan keperluan dapur dan juga sebuah kerusi roda. Beliau pernah terlibat dalam kemalangan jalan raya pada tahun 2015 dan kini tidak bekerja akibat kekangan pergerakan dan kesihatan.

Pada program itu kesemua penerima sumbangan serta ahli keluarga mereka turut diberikan penerangan berkaitan program Kitar Semula berganjaran, KITAREcycle bagi menggalakkan



penerima-penerima untuk menjalankan aktiviti pengasingan sisa dari rumah bagi menjana pendapatan sampingan menerusi KITAREcycle.

-TAMAT-

MENGENAI SWM ENVIRONMENT SDN. BHD.

SWM Environment Sdn. Bhd. (SWM Environment) adalah syarikat konsesi yang menyediakan perkhidmatan pengurusan sisa pepejal dan pembersihan awam di negeri Johor, Melaka dan Negeri Sembilan sejak tahun 1995, melalui perjanjian konsesi yang dikawal di bawah Akta Pengurusan Sisa Pepejal dan Pembersihan Awam Negara (Akta 672).

Sebagai syarikat konsesi terbesar di Malaysia, SWM Environment, melalui tenaga kerja yang seramai 12,000 orang, berkhidmat kepada 27 pihak berkuasa tempatan, 1.5 juta premis kediaman dan komersial dengan lebih daripada 5.1 juta orang bagi liputan geografi 28,500 kilometer persegi. Untuk maklumat korporat yang lebih lanjut, sila layari laman web: www.swmenvironment.com.

Dalam usaha mengurangkan sisa janaan ke tapak pelupusan sampah, SWM Environment secara giat mempromosikan program-program alam sekitar yang berimpak tinggi seperti Pengasingan Sisa Pepejal Di Punca (SAS), kitar semula dan pengkomposan sisa makanan demi meningkatkan kesedaran awam di kalangan masyarakat umum.

Pada 2018, SWM Environment telah memperkenalkan program kitar semula berganjarannya, KITAREcycle, di ketiga-tiga negeri selatan Semenanjung Malaysia. KITAREcycle menggalakkan orang ramai untuk mengitar semula dan menerima mata ganjaran untuk lebih daripada 25 jenis barangan kitar semula yang termasuk kertas, tin aluminium, plastik, sisa elektrik dan elektronik. Mata ganjaran yang terkumpul boleh ditebus secara tunai melalui perbankan dalam talian. Orang ramai boleh memuat turun aplikasi KITAREcycle melalui *Apple Store* dan *Google Play Store*. Sila layari laman web: www.kitarecycle.com untuk mendapatkan maklumat lanjut.

Untuk keterangan lanjut, sila hubungi:

Puan Noor Che Wah Binti Ramli

Eksekutif Kanan

Jabatan Komunikasi Korporat & Hal Ehwal Kerajaan

SWM Environment Sdn. Bhd. (Pejabat Wilayah Melaka)

Tel : 06 – 3350191 / 012 – 385 1436

E-mel : wah.ramli@swmsb.com